

Prva saznanja i kriteriji vrednovanja vlastitih postupaka i ponašanja drugih ljudi u ljudskoj duši se rađaju i postepeno formiraju putem odgoja. Preporukama i zabranama, ali najviše vlastitim primjerom i ponašanjem roditelji odgajaju svoju djecu i tako ih pripremaju da kao slobodne i odgovorne ličnosti ponesu breme svoga života. Tek u zrelim godinama života kada i sami postanemo roditelji shvatimo važnost porodičnih navika i odgoja koje često trajno formiraju naše temeljne karaktere. Socijalni i prosvjetni radnici svakodnevno upozoravaju na negativne trendove u roditeljskom odgoju koji već decenijama idu u prilog razvoju „otuđenoga, nekomunikativnog djeteta, djeteta s poteškoćama u učenju, djeteta koje nije moguće kontrolirati“. Tragovi i simptomi ove „epidemije popustljivog odgoja“ jednako se mogu uočiti u školskom dvorištu, igralištu tramvaju ili na elektronskim društvenim mrežama. Uobičajene i standardne fraze o tome da se u našim obrazovno-odgojnim institucijama vaspitanju mladih ne poklanja dovoljno pažnje same po sebi su bekorisne ako iza takvih tvrdnji ne postoje stručne analize, programi konkretnog odgojnog djelovanja i spremnost da se preveniraju posljedice.

Kako odgajati čovjeka u vremenu neprestane borbe za egzistenciju i mnogobrojnih društvenih utjecaja i izazova? Je li moguće primjenjivati tradicionalne metode odgoja u svijetu u kome sve manji značaj pripada tradicionalnim institucijama? Ko je, uopće, kompetentan da odgaja čovjeka? Postoji li minimum društvenog konsenzusa o univerzalnim etičkim vrlinama koje bi morale biti sastavni dio svakog obrazovno-odgojnog procesa? Nastojeći da rasvijetlimo pitanje odgoja sa što više relevantnih aspekata odlučili smo ovaj broj *Novog Mualima* posvetiti ovoj značajnoj temi.

Sadržajne i inspirativne tekstove o odgoju u ovom broju potpisuju Mehmedalija Hadžić, Haris Cerić, Muamer Neimarlija, Senad Bećirović, Safija Malkić, Edina Kos-Burić, Mirzeta Jahić, Rasim Tobudić i Almedina Čelebić. Intervju sa profesorom Mujom Slatinom preporučujemo kao koristan orijentir i smjerokaz zabrinutim roditeljima, ali i svim našim imamima i mualimima koji se izravno suočavaju sa brojnim dilemama u odgoju mladih.

Sa nadom da će ovaj broj *Novog Mualima* biti povod konstruktivnim dijalozima i diskusijama o odgoju unutar institucija Islamske zajednice zahvaljujem se članovima redakcije, saradnicima, prijateljima i čitaocima za dosadašnju velikodušnu podršku koja me je hrabrila da odgovorno i savjesno obavljam poziciju urednika našeg renomiranog časopisa. Novoj urednici gospođi Senadi Tahirović želim puno uspjeha, ustrajnosti i strpljenja.

Meho ŠLJIVO